

# KIRBEPREDIGT 2014

Liebe Leut' von Benningen,  
freit mi, dass Ihr so zahlreich vor mir steh'n.  
Aus älle Egga send Ihr ronter g'laufe  
om im Pfarrers Wortschwall zu ersaue.  
Selbsch dr Schultes hat sich rontertraut,  
dr Ärger von letscht Jahr scheint also verdaut.  
Onsere Vorgänger hend Dir ja einiges om'd Ohre g'haue,  
hend dr Warthon zwei13 verbal ganz schee verhaue.  
Mir waret ned sicher, hend scho noch dr glotza wella,  
du, sinnierend, im Neubaugebiet an dere neie Stella.  
Wo mr sich so selbschderfahrungsmäßig ond kreizguat  
über Glasscherba wandelnd seine Zaihe uffschlitza duad.  
Liabs Herrgöttle, was hend Ihr Euch jetzt dabei wieder dacht?  
Sogleich schnellte hoch der arg schlimme Anfangsverdacht,  
dass d' Firma Kurz und d' AVL, hälenga ond mucksmäuschenstill,  
dia leer g'soffene Weinflasche so an ons Bürger zurück geba will.  
Aber jetzt hemmer'n schon agzebiert, onsern Fitti Parcours,  
geplante Bürgergenesung, mit perfektionistischer Bravour!  
Des gibt a Sonderlob für onsere g'wählte Volksvertreter,  
doch wenn mr genau naguckt wird's für ons Bürger scho konkreter.  
Dr Fitti Parcours hend die Räte schlicht für sich selber nabaut,  
denn, wenn in dr Sitzung älle Vorlage streitend durchgekaut,  
dürfet sich die erhitzten Ratsgemüter und Polit-Debattierer  
em Becka d' Haxa abkühla ond sich d' Zenka wieder gradmassiera.  
Aber vielleicht kommet se vom Rathaus gar ned bis da oba ganz nuff,  
denn sie müsset überquere d' Lange Strooß mit knatterndem Auspuff.  
Des isch seit neieschtem aber a ganz a g'fährliche Sach,  
mr wollt se ja verkehrsberuhige vom nächtliche Motorraserkrach.  
Doch seid die Egga da obe verkehrsberuhigt send,  
scheppert's öfter, wie viel Ofäll mir jetzt scho wieder hend?  
D' Fahrer da obe send verwirrt ond voll durch dr Wind.  
Vorfahrt? Awa! Älle fahret gleichzeitig ond des aber ganz arg g'schwind.  
Schultes, mir wellet drwäga ned wirklich über Dich läschtere,  
au ned, wenn mir denket an onsere ältere Semeschtere.  
Ond an des emmer noch ungelöste Ladenproblem em Flegga,  
dei Koschten-Nutzen-Analyse duad koim so richtig guat schmegga.  
Jetzt miaßet dia Alte emmer no dr Buggel nuff ächze  
wenn se nach Einkaufs-Sonderangebote sabbern on lechza.  
Doch bevor se für dr Abstieg nonder anfang zom hetza,  
könnet se sich ja mit ihre volle Gugga ins neie Wasserbecka neisetza.

***Denn egal, was passiert, mir haltet scho zamma.***  
***Weil mir Benninger send ond aus Benniga stamma.***  
***So war's, so isch's und wird's au emmr so bleiba.***  
***Kirbe isch Tradition, ons kann koiner vertreiba.***

Des Neubaugebiet hat sich trotzdem richtig schee g'macht,  
s'isch au bald alles verkauft, des wär doch gelacht.  
Dr Kindergarten hat sei Richtfescht au scho begange,  
direkt davor blüht dr Kreisverkehr, Schultes, mr isch oinr richtig abgange.  
Wenn bloß die „Fuck You“-Schmiererie ned g'wäse wäret,  
bloß guate Nachrichten hätt onser Gemeinde des Jahr gebäret.  
Apropos: Dr 6000. Einwohner hat sich au scho hier blicke lasse,  
vom Schultes gab's a Sparschwein, da blieb ned mol die kloie Mia cool  
und gelasse.  
Ond noch en Neuling hend mir des Jahr hierher bekomme,  
außer mir, en zwoite Pfarrer, der Herr isch jetzt scho ganz benomme.  
Weil er des alte Dach von seiner Kirch in Augenschein g'nomme  
Des kannsch bloß verkaufe, hat er sich g'sait, ond gleich en fetta Batze  
dafür eing'nomma,  
s'Dach wird jetzt g'richtet, bald tropfts nemme in d' Kanzel hinunter.  
Auß em Gottesdienst kommt mr ned bloß beseelt, sondern au trocken  
und putzmunter.  
Weil: gleich nebenan wird onsere Heimatkultur uff'd Schippe g'nomma,  
em Pfarrhaus drehet se die Serie wo mir dr Spiegel vorg'halte bekomme.  
Wia se sich verschlaget ond wieder vertraget,  
die zwei Nachbardörfer, die sich gegenseitig so plaget.  
Zum Glück send mir in Benningen ond ned en Unterrieslinga,  
ond driaba kommet se aus Marbach ond bloß beinah aus Oberfieslinga.

***Denn egal, was passiert, mir haltet scho zamma.***  
***Weil mir Benninger send ond aus Benniga stamma.***  
***So war's, so isch's und wird's au emmr so bleiba.***  
***Kirbe isch Tradition, ons kann koiner vertreiba.***

Wie mr's au dreht ond romm ond nomm wendet,  
für nächschd's Jahr sind die Aussichte wirklich ganz blendend.  
D' Ortsumfahrung wird wohl endlich in Angriff g'nomma,  
mr hat nach zwölf Jahren aus Stuerget endlich die Signale vernomme.  
Dann kann mr vielleicht auch bald die Beihinger Strooß  
ins Straßenfest integriere, des wär was ganz was groß.

Weil des alte Konzept von onserer traditionelle Sommer-Fete g'hört längscht überholt, schonschd verdient die Vereine nemme viel Knete.

Ond müsset sich andere ganz tolle Sache einfalle lasse, zom Beispiel den Sommerbiathlon, der isch wirklich ganz klasse.

Oder wie wär's mit einer Boule-Bahn im laissez-faire-mediterrane Stil? Onserer alte Säck brauchet Zerstreung, ond von dem möglichscht ganz viel.

Dazu hend mir grad äba vom Höresage vernomme, dass mir vielleicht bald ä neue, alte Boiz en Flegga bekomme?

Hend mir richtig g'hört dass d' Krone samt Wohnhaus von dr Gemeinde gekauft worda isch?

Wenn des stimmt, dann wär des gröschte Versorgungsproblem bald wirklich vom Tisch.

Also, großer Schultes, brauchsch Dich wahrlich nicht verstegga, en Dei'm kleine, beschauliche Bottwartal-Flegga.

Die „Ice Bucket Challenge“ hasch ja au scho mol g'wonna, was kann jetzt no Schlimmeres als Eiswasser über Dich komme? Gefährliche Bewerber gegen onsern Bürgermeischer Klaus sind noch kaum in Sicht für die Wahl zwei15 oms weiße Rathaus.

Du musch Dich seit em Sommer halt mit andere Mehrheite begnüge, mit Schwarz-Rote verhandele isch wahrlich ned emmr a Vergnüge.

Obwohl, die Tag lieget se sich wieder älle in den Armen, denn vor 25 Jahr hatten alle Götter und die Geschichte großes Erbarmen.

D' Mauer isch damals na g'falle, was für a groß' Jubiläum, ond vorbei war's mit dr DDR, dr SED ond ihrem Allmacht-Kolosseum.

Damals waret mir Buaba ja no ned mal uff dr Welt, awa, onserer Leit hend sich damals ihr Läba bestimmt au no andersch vorg'stellt.

Jetzt gucksch aber mol an unsere Neubausiedlungen von auße genauer nuff, Ond du fragsch di, warum bauet se die Mauer bei ons grad wieder uff?

***Denn egal, was passiert, mir haltet scho zamma.***

***Weil mir Benninger send ond aus Benniga stamma.***

***So war's, so isch's und wird's au emmr so bleiba.***

***Kirbe isch Tradition, ons kann koiner vertreiba.***

Jetzt wird's Zeit, dass mir amol aus onserm Flegga nausglotzet ond ons über dia viele andere Denger in dr Welt d'Galle rauskotzet.

Obwohl über Ebola, ISIS, Gaza ond dr Kriegstreiber Wladimir willsch ned wirklich reda, lass des bloß ned so oft ran an Dir.

Schonsch wirsch depressiv ond s' wird angschd und bang, Demokratie ond friedliche Zeite gibt's offenbar ned von dr Stang.

Des muass mr verteidige, gege die, die offenbar no läbet, em Mittelalter, wo ziemlich viel Blut an de Leit ihre Hände feschtkläbet.

Des Finschtere wellet mir hier unter keine Umständ mehr haben, Freiheit, Toleranz und Menschenwürde ist das, woran wir uns laben.

Aber uffpasse sott mr fei scho, dass mir unsern Pfad ned verlasset, also, dass mir ons bitte ned von dere Gewaltspirale erfasse lasset!

Aber zom Glück hend mir in Berlin ja ä neue Verteidigungsführung, Schwarz-Rote Reptilien send bissig vor lauter Glanzprofilierung.

Die „Gro-Ko-Dile“ sind los ond machet ganz große Politik, D' Angie, dr Sigggi, dr Horscht beißet gnadenlos z'rück bei jeder Kritik.

Se moinet's ja au wirklich guat mit ihre erschte Maßnahmen, Mütterrente oder Mindestlöhne, e paar Almose mit luschtige Name.

Ä Rentapaket war au no dabei on d'PKW-Maut soll's tatsächlich bald gäbe, war des alles richtig? Mir wellet's Euch glaube, aber mir werdet's erläbe!

Es gibt halt bei ons z'viele, die haltet sich für dr liebe Gott persönlich, b'scheißet hälenga dr Staat ond gäbet sich vorne romm versöhnlich.

Könnet dr Kraga ned voll g'nuag g'stopft kriaga, hallo Uli, wie lang hasch Dein Hoeness no auf Dei'm Knaschtbett romliaga?

Ond musch Deine Super-Duper-Mega-Bayern mit andere Kriminelle im Knascht-TV statt im Free-TV teilen.

Aber s'dauert nemme allzu lange, dass de in Landsberg muasch hogga, Bei guter Führung kannsch bald wieder hochrot schimpfe ond e paar Milliona verzogga.

***Denn egal, was passiert, mir haltet scho zamma.***

***Weil mir Benninger send ond aus Benniga stamma.***

***So war's, so isch's und wird's au emmr so bleiba.***

***Kirbe isch Tradition, ons kann koiner vertreiba.***

Ned viel besser benomme hat sich offenbar ganz gern onser großer Autoclub und Versicherungskonzern.

Awards, Preise und Rankings hend se sauber manipuliert, mei Liaber, die Gelbe Engel hend sich ja ganz schee verspekuliert.

En große Knall hat's doa ond Köpf send au dabei g'rollt, ond mr möcht wirklich gern wisse was schonscht no war g'wollt.

Mir Verbraucher wisset bald nemme, was falsch isch und was richtig, bloß ois isch klar: Dr ADAC steht jetzt selber en dr eigne Pannenstatistik.

Und wemmer schon bei Panne grad stehbliaba send, na müsset mr zum Wase nonder gugga, ned bloß ganz g'schwend.

Beinah hätt's en Donderschlag do vom viele Tore kriaga, ond onser VfB wär schnurstracks en'd zweita Liga abg'stiaga.

En Holländer hot's braucht om dr Ernstfall zu verhindere, dr Hüüb hat's g'radboga, er ließ sich von koim meh behindere.

Von dere Ofähigkeit in der Direktore- und Führungsetage, dr Armin führt's jetzt z'rück zom Fußball mit Herz und Courage.

Oimol hot er's jo scho g'schafft, s'wird heut no ganz blümerant, wenn mr an zwei-sieba denket, als Meisterschaftsjahr bekannt.

Des goht heit nemme so einfach, des woiß jedes Kind, dia G'stopfte setzet sich ab, die mit dem Konzerngeld im Spind.

Ob Red Bull oder VW, ob Bayer oder SAP, da kann er ned mithalte onser Traditions-Vau-Eff-Be.

Er muss sich kapitalisiere, ond des ned erscht morga,  
schonsch hemmer jedes Johr die gleiche Abstiegsorga.  
Könnst ja sei, dass dr Daimler die Weiß-Rote bald onderstützt,  
seither hat er sei Kohle beim DFB für sei guat's Imitsch genützt.  
G'lohnt hat sich des Sponsoring auf alle Fälle, mir erinnern ons gerne,  
am Weltmeistertrikot prangt der vom Mercedes ond jetzt au vier Sterne.  
Em Messi hemmer em Finale kurz vor Schluss doch no oin neig'setzt,  
vorher hemmer die Brasilianer zerlegt ond ihr Volk in der Seele verletzt.  
Aber luschiedlich war's scho, mir denket bloß an dr muskulöse Müller,  
wie er vorm Freistoß stoplernd nahagelt, des war der Slapstick-Brüller.  
Oder wie Mertesacker dem schleimige Reporter s'Maul grad schee g'stopft,  
als dem sei bleeds G'schwätz wie klebriger Geifer aussem Mikro naustropft.  
Mit dem Gaucho-Dance hend se sogar für diplomatische Vewirrung g'sorgt,  
Oder Altpapst Benedikt: Hat vom Franziskus 's Papamobil für dr Auto-  
korso ausborgt.  
Bloß: D'WM war em Sommer ond des isch jetzt vorbei,  
jetzt verlieret sie wieder, sogar gegen Polen, heidenei.  
Guru Jogi, da muasch dr wieder was eifalle lasse,  
offenbar duad die Weltmeister s' Glück ond au ihre Fraue g'rad verlasse.  
Em Schweini, em Neuer ond em Özil send in kürzeschter Zeit  
ihre Mädle weggloffa, die send jetzt für andere Herre bereit.  
Doch Models ond TV-Shows gibt's bei ons ja jede Menge,  
da wird doch oine dabei sei, so en Hongerhaka em Rote-Teppich-  
Gedränge.  
Zom Schluß miaßet mr no uffgäbe e Vermissteanzeige,  
Wahl om Wahl d'en se seit Jahren zielsicher vergeige.  
FDP! Wo bisch denn eigentlich grad abblieba?  
Dusach de verstegga oder hend se de endgültig verriaba?  
Heimlich, still und leise hend sich die Liberale  
vom Politbetrieb abg'meldet, ganz ohne Skandale.  
Jetzt glotzet mr alle ganz gebannt ond verstört  
auf die AfD, koiner woiß so recht, wer derra wirklich ang'hört.  
Send des weitsichtige Leit ond Wirtschaftsintellektuelle?  
Oder hemmer ä Sammelbegga für Versprengte mit so mancher kloine Delle?  
Steckt wirklich was dahinter oder den dia ons au für domm verkaufe?  
Mir werdet's bald sähe, ob se was tauget oder sich au wie die Pirate verlaufe.  
Oins habb i aber faschd no vergesse ond aus Versehe ausg'spart,  
des singende Äbbes mit Glitzerkleid ond schwarzem Vollbart.  
Hanswurscht oder so ähnlich hat er oder sie sich g'hoiða,  
hat den Song Contest g'wonna ond wollt damit was bewaise.  
Dass mr sei Läba uff vielerlei Weise  
läba ka ohne sich selber zu bescheiße.  
Es braucht bloß e bissle meh Toleranz von de Leit,  
na ko'schd anziaga was dein Schrank hält für dich bereit.  
mei Robe, wenn i ehrlich ben, isch ja au irgendwie – ä Kleid.

*Denn egal, was passiert, mir haltet scho zamma.  
Weil mir Benninger send ond aus Benniga stamma.  
So war's, so isch's und wird's au emmr so bleiba.  
Kirbe isch Tradition, ons kann koiner vertreiba.*

AMEN